

AMPLAZ VERBUETER

# Handye ran an d'Schoulen

Chris Pesch

**Sollen Handyen a Schoule verbuede ginn? Ganz am Géigendeel, fënnt een Enseignant an dëser fräier Tribün.**

D'Diskussioun iwwert d'Stellung vum Handy an der Schoul ass keng nei. Nei entflamt gouf se a Lëtzebuerg awer spéitstens mam Lieserbréif vum Georges Urwald, Museksprofessor, am Luxemburger Wort, de 17. Dezember d'lescht Joer. A sengem Bréif erkläert hien, deen en Aarbechskolleeg vu mir ass an deen ech als nodenklechen an engagierten Enseignant schätzen, dass hie sech eng politesch Decisioun wënscht, déi d'Handye vum Terrain vun de Schoule verschwanne léisst. Hie begrënt dat mat engem humanisteschen Usproch: Méi Fokus op sech selwer, méi Zesummenaarbecht, méi Rou am Ëmgang mateneen dank engem „geschützten Raum“, an deem de permanenten Afloss vum Medialen gedrosselt gëtt. Decisiounen, wéi dat vill beschwate Verbuet an Holland ab nächstem Joer, respektiv am Lycée Ermesinde zum Ufank vum neie Schouljoer, setzen dat ëm, wat hie sech wënscht.

D'lescht Woch war et dann um Marc Thill, Editorialist am Wort, fir sech dësem Appell unzeschléissen, a sech e konsequent Verbuet vun den Handyen ze wënschen. Mee aneschtens wéi de Georges Urwald, dee sech zentral d'Fro stellt, wéi d'Technologien eis Konzentratiounsfäegkeet beaflossen, monéiert den Thill pauschal den Zäitverloscht an d'Onselbststännegkeet, déi duerch d'Handye

verursaacht ginn. Fir hie mussen d'Handyen aus de Schoule raus, well si de Schüler „Fake News, Pornografie, Hass, krude Theorien und das schreckliche Schaulaufen der Eitelkeiten“ bidden an domat d'Jugend verdierwen. An do gëtt et da méi schwéier, mat der Argumentatioun nach matzegoen. Mee der Rei no.

**Firwat Handyen a Schoule kritesch betruucht gi kënnen**

Grënn, firwat een d'Presenz vun Handyen a Schoule kritesch betruuchte kéint, gëtt et der e sëllegen. Jonken e Raum ze bidden, an deem si disconnectéiert sinn a sech reng op hir eegen Entwécklung konzentréiere kënnen, ouni sech Gedanken driwwer ze maachen, wat soss an der Welt lass ass, ass sécher e sënnvollt Zil. Informatiounen ze kompartimentaliséieren, de Fokus op eenzel Aktiounen ze leeën a sech net permanent oflenken ze loosse vun Externem, si Fäegkeeten, déi all Mënsch gutt ze Gesiicht stinn. Wa Schoulen dat iwwert de Wee, dass si – temporär oder konsequent – dës Externalitéiten aus der Welt schafen, hikréie géifen, wier sécher kengem Jugendleche geschuet. Am Géigendeel.

An ouni Zwiwiel, den Drock, deem Jonker sech selwer aussetzen iwwert hir Presenz an de soziale Medien ass reell, genee esou wéi d'Phänomeen vum Cyberbullying. Do wou Leit aus menger Generatioun, am Alter vu 14-15 Joer, wa se aus der Schoul heemkomm sinn, zwar net komplett ofschalte konnten, mee awer wéinstens net

hu fäerte missten, weidere Geforen duerch Matschüler\*innen ausgesat ze sinn, gëtt et fir déi Jonk haut quasi keng Paus. Souwuel während de Schoulzäiten, wéi och duerno, si si der stännege Gefor vun Attacken ausgesat. D'Konsequenzen op hir mental, emotional a physesch Gesondheet, déi dëst hu kann, sinn evident.

Och Spillsucht ass en existéierende Probleem, deen, duerch d'Omni-presenz vum Handy am Liewe vun de Jonken, méi visibel ginn ass. Viller gräife quasi reflexaarteg an all kuerzer Paus zum Handy fir nach séier e Level an engem vun hire Spiller an Ugrëff ze huelen. Anerer scrollen wéi an Trance duerch TikTok oder Instagram. An natierlech sinn d'Risiken, dass een sech iwwer Filterbubble radikalisiere kéint, grad bei Jonken, besonnesch besuergneserreegend. Géint all dës Probleemer sollte Schoule konsequent virgoen.

**Vun aktuelle Méiglechkeeten a Pabeiertigeren**

An aktuell ass et jo schon esou, dass d'Schoulen dat am Prinzip maache (kënnen). D'Schoulgesetz vum Secondaire seet dozou kloer a sengem Artikel 42, dass „la confiscation temporaire d'un objet qui est interdit dans l'enceinte du lycée ou au cours“ eng Méiglechkeet ass. Dat heescht, verbidden ech d'Notzung vum Handy am Cours, kann ech en ofhuelen, falls de Schüler en awer ouni Erlabnis benotzt hätt. Dat ass am Fong net anescht, wéi wann e Schüler onerlaabt sech d'Hoer kämmt, oder eng Schülerin

ënnert der Bänk d'Luxemburger Wort liest. D'Enseignante\*ë hunn d'Recht, déi Objeten ofzehuelen, wat duergoe misst, fir d'Notzung vum Objet an domat d'Oflenkung anzeschränken.

Iwwert dese Wee kann eng Schoul verschidde vun deene geféierlechten Auswüchse verhënneren oder op mannst emol agrenzen. Handytäschchen oder -këschtchen kënnen weiderhin dozou bäidroen, dass d'reflexaarteg Gräifen nom Handy verhënnert gëtt. Mee eleng d'Experienz mat dese misst all Enseignant\*e un der Effikassitéit vun engem generelle Verbuet vun Handyen zwiwele loossen. Well et ass jo déi eng Saach, eppes ze verbidden, mee eng ganz aner Saach, fir z'iwwerpräiwen, ob d'Verbuet och agehale gëtt. A wéi all Mënsch, deen emol op enger Lëtzebuenger Strooss Velo gefuer ass, a sech iwwert annerhallwe Meter Sécherheetsofstand fret, weess, ass e Verbuet, wat net iwwerpräift gëtt, eigentlech keent.

D'Léisung, déi dacks proposéiert gëtt, ass déi, dass Schüler\*inne moies virun der éischer Stonn hiren Handy ofginn an en no der leschter Stonn zeréckkreien. Vum administrativen Méiopwand mol ofgesinn, léist esou eng Mesür de Problem net, mee schaaft amplaz just Raum, fir no Schlupflächer ze sichen. D'Fëmmen ass prinzipiell an allen öffentleche Gebaier verbueden an awer richt et op ville Schüler\*innentoilette landeswäit no Zigaretten. Firwat? Well op Toilette keng Surveillance gehale gëtt, a soulaang Schüler\*inne sech net géigesäiteg verklappen, kee beim Fëmmen erwëscht gëtt. Handyen ze

Stonnaange Konsum vu soziale Medien fënnt net an der Schoul statt: Souguer bei duerchlässege Proffen ass et schwéier virstellbar, dass Schüler\*innen e ganze Schouldag iwwer hiren Handy benotze kënnen.



FOTO: PIXABAY/GIOVANNACCIO

verbidden an anzesammelen, géif a ville Fäll dozou féieren, dass al Maschinnen ofgi ginn, während een säin aktuellt Gerät bei sech hält. Not macht erfinderisch – a fir op déi Iddi ze kommen, brauche Schüler\*innen net vill Imaginatioun. D'Notzung vun den Handye verlagert sech einfach op déi Plazen, wou keng Surveillance stattfënnt, wéi zum Beispill Toiletten. Et ass eng Léisung, déi déi Jonk dozou verulaasst, sech ze verstoppen an allgemeng eng Atmosphär vu Mësstrauen an Iwwerwaachung férdert, déi hinnen an hiren Enseignante\*ë weder perséinlech nach am Sënn vun hire Léierprozesser dénglech ass.

Donieft: Villes vun deem, wat een als negativ Effekter vun Handyen op Jonker unhuele kéint, spillt sech kaum bis guer net an der Schoul of. Cyberbullying, zum Beispill, steet oft a Relatioun mat der Schoul, well d'Bezéiungen, déi et erméiglechen do geschaaft ginn, mee gëtt manner do praktizéiert, well een an der Schoul eben och op direktem Wee en aneren ugräife kann. Stonnelaange Konsum vu soziale Medien fënnt ausserhalb vun der Schoul statt, well et souguer bei duerchlässege Proffen, schwéier virstellbar ass, dass Schüler\*innen e ganze Schouldag iwwer hiren Handy benotze kënnen. Den Handy ze verbidden ass sou gesinn, wéi wann ee wéilt den Doping am Tour de France verhënneren, andeem ee Bluttransfusione während den Etappe verbitt. En Handyverbuet ass deemno näischt anescht wéi e Pabeiertiger, dee säi genannten Zil

verfeelt, a schlëmmstefalls esouguer d'Bezéiung tëscht Schüler\*innen an Enseignante\*ë verschlechtert.

### Wéi Schoule mat Handyen ëmgoe kënnen

Wann d'Zil e sécheren, reflektéierten Ëmgang mat neie Medien ass, dann däerfen Handyen deemno net aus Schoule verschwannen. Vill méi mussen se, dem SAMR-Modell (Substitution, Augmentation, Modification, Redefinition) no, an den Unterrecht mat agebonne ginn. De Marc Thill schreift a sengem Editorial, dass, wa Mënsche keng Handyen hätten, déi si oflenken, se méi Zäit hätten, Heelmëttel géint Kriibs ze erfuerschen oder Konscht ze schafen. Mee dësen, d'Grenzen vum Sënnhaften strapazéierenden, Verglach, kreéiert de falschen Androck, dass Fuerschung a Konscht nëmmen da stattfannen, wann een\*t sech a Rou mat engem Bic an engem Blat Pabeier senger Aarbecht widme kann. Esou eng Ausso léisst komplett ausser Uecht wéi modern Technologïe souwuel an der Fuerschung wéi och an der Konscht agesat gi kënnen. Se ignoréiert ausserdeem, wéi Communautéit an Interaktivitéit e positiven Effekt op Léieren, Fuerschen a Kreativitéit hu kënnen. Et ass jo net esou, dass, wa mer just keng sozial Medien méi hätten, mir alleguer op eemol zu neie Marie Curien a Shakespearen géife ginn – d'Welt ass dann awer méi komplizéiert.

Wat Schoulen dofir brauchen si Mediennotzungskonzepter, déi sech net nëmmen op Smartphones be-

schränken, mee all méiglech Technologien, wéi Tablets oder Software, déi op sougenannter kënschtlecher Intelligenz baséiert, mat abezéien. Schoule sollen sech net froen, ob jo oder nee, mee wéi (net), wat (net), wéini (net) a firwat (net). Schwéier virstellbar wat fir ee pedagogesche Sënn een doran erkenne soll, wann d'Schoul e Verbuet vun Technologien als ultima ratio betruechten a sech der inhaltlechen Ausernanersetzung mat hinne verschléisse soll. Villméi mussen dach Pedagog\*innen erkennen, wéi eng Methoden an Outilen si asetze kënnen, fir hire Schüler\*innen ze hëllef. Natierlech ass dat net einfach. Mee sech ondifferenziert eng ganz Rëtsch Méiglechkeeten ze verbidden, ass eng Kapitulation virun der Komplexitéit vun der moderner Welt, an net e Schrëtt zum Schutz vu Jonken, déi op der Sich no hirer Plaz an dëser sinn.

Net réischt zënter dem John Dewey ass et eng primordial Aufgab vun der Schoul, dass si sech mat Realitéiten an net just mat Abstraktioun befaasst. D'Existenz vu Smartphones ass esou eng an d'Notzung dovunner am Schoulalldag reng ze theoretiséieren, dréit kaum dozou bäi, dass e gesonden Ëmgang mat de Medien erléiert gi kann. Géifen Handye verbueden, kéim d'Schoul deemno net méi hirer Roll als demokratesch Institutioun no, well si sech weder vum deemools géif beweege loosse, andeem si Stréimungen aus der Gesellschaft ophëlt a sech zu Notze mécht, nach demokratiséierend wierke géif, andeem si Léisunge fir Probleemer

beschwätzt, ausschafft an engem breede Public presentéiert.

### Give a little respect

Dass de Marc Thill ofschléissend mengt, et misst een de Jonken, Smartphones an Tablets ofhuelen, well hinnen dorop Zougrëff ze loosse, en Zeeche vu Respektlosegkeet hinne géigeniwwer wier, ass natierlech eng staark Ausso. Mee ech huelen d'Polemik un. A mengen Ae wier et méi respektlos, Jonken d'Fäegkeet, sech multipelen Interessen an Opmierksamkeeten ze widmen, ofzeschwätzen. Et ass méi respektlos, ze mengen, dass eeler Generatiounen, déi hiert ganz Liewe kollektiv duerch eegen Ofhängegkeeten, sief et medialer Form oder soss, opgefall sinn, iwwert den Zougrëff vu Jonken op wesentlech Bestanddeeler vum soziale Liewen hautdesdaags, entscheeden dierfen. An et ass méi respektlos, an de Raum ze stellen, dass Jonker net capabel sinn, e kriteschen a selwer gesteierten Ëmgang mat techneschen Outilen ze erléieren, a quasi viru sech selwer geschützt gi mussen.

De Marc Thill huet mech iwweezeegt. Handyen a Schoulen ze verbidden ass net nëmmen eng simplistesche Reaktioun op e ganz komplex gesellschaftlecht Thema. Et ass respektlos. Dofir mäi Plaidoyer: Handye ran an d'Schoulen.

De Chris Pesch ass Enseignant am Secondaire. Dësen Text ass fir d'éischt op sengem Blog pianocktail.lu publizéiert ginn.